

Ina vasta schelta d'ideas

La grupp rumantscha en il cussegl grond ha discutà la pressa rumantscha

DAD ANDREAS CADONAU

■ **La grupp rumantscha dal cussegl grond è sa radunada en il ravugl da la sessiun la mesemna passada. In dals temas principals è stà l'avegnir da la suletta gasetta rumantscha dal di. Deputadas e deputads han laschà informà e discutà cun il president da la Lia Rumantscha e cun il substitut dal secretari general.** Intervenziuns politicas en caussa La Quotidiana na sajan betg planisadas, ha il president da la grupp rumantscha en il cussegl grond, *Filip Dosch*, fatg a savair. La scuntrada dals commembers da la grupp rumantscha en il cussegl grond cun il president da la Lia Rumantscha, *Johannes Flury*, ed il substitut dal secretari general, *Andreas Gabriel*, haja primarmain già caracter d'informaziun per deputadas e deputads. Momentan saja il cussegl da fundaziun da l'ANR dumandà da prender posiziun. Quai damai che la brev da l'editur *Hanspeter Lebrument* sa drizzia direct al cussegl da fundaziun. Filip Dosch ha explitgà che la grupp rumantscha vegnia sulet activa politicamain sch'il cussegl da fundaziun e la Lia Rumantscha stipuleschian propostas concretas che pretendian intervenziuns politicas. Il timun da la grupp rumantscha en il cussegl grond deplorascha la pressiu da temp che l'intervenziun da l'editur ha chaschunà per chattar soluziuns per

l'avegnir da La Quotidiana. Tenor las explicaziuns da Filip Dosch sajan las ediziuns da print en general sut pressiu en tras la digitalisaziun. Ina eventuala midada d'ina ediziun da print sin ina ediziun digitala na saja betg simpla. Filip Dosch ha fatg attent en quest connex a la Pagina da Surmeir che stettia avant sumegliantas sfidas. D'ina vart possedian las gasettas abunnts pli vegls che sajan betg pronts, almain per part, da midar tar ina ediziun digitala. Da l'autra vart stettia ina generaziun pli giuvna bain disada da s'informar via ils meds electronics, dentant betg pronta da pajar per ina purschida digitala.

La cunvegna da prestaziun è deliberada

Filip Dosch fa medemamain part al cussegl da fundaziun da la ANR ed el deplorascha che l'editur da la Somedia ha formulà sias pretendiuns finanzialas per l'avegnir da La Quotidiana en sia chasa suenter che la ANR è sa cunvegna cun il chantun davart la cunvegna da prestaziun per ils onns proxims. Ina situaziun che na levgeschia betg la tschertga da soluziuns. Andreas Gabriel da la Lia Rumantscha è stà da la partida cun il president da la Lia Rumantscha Johannes Flury a la scuntrada cun deputadas e deputads rumantschs. El ha ditg che la Lia haja instradà la scuntrada cun la grupp rumantscha dal cussegl grond. D'ina vart



Filip Dosch maina la grupp rumantscha dal cussegl grond ch'è sa scuntrada cun ils represchentants da la LR per discutir la situaziun actuala da la pressa rumantscha.

FOTO M. HARTMANN

per informar deputadas e deputads davart il stan acutal e co proceder proxima main. Questas informaziuns sajan stadas bainvegnidas dals preschents a la scun-

trada. Da l'autra vart haja la Lia vuli udir ils divers parairis da la represchentanza rumantscha en il parlament chantunal pertutgand la pressa rumantscha. La discussiun cun deputadas e deputads saja stada fitg interessanta, ha Andreas Gabriel fatg a savair ed i saja vegnì stipulà in mantun ideas pertutgant l'avegnir e la furma futura da la pressa rumantscha. Da l'impurtanza dal pled scrit per la promozion linguistica saja la represchentanza politica rumantscha senz'ater per tscharta, ha ditg Andreas Gabriel. Era il represchentant da la Lia Rumantscha è da l'avis che la proxima decisiun giascha tar il cussegl da fundaziun da l'ANR.

Impurtanza dal pled scrit

D'ina intensiva discussiun ha medemamain discurre la deputada *Margrit Darms*. Ella fa part dalla grupp rumantscha ed ha da sia vart fatg attent a las diversas ideas formuladas entaifer la grupp en connex cun la pressa rumantscha e l'avegnir da la suletta gasetta rumantscha dal di. Sco per exempel ina pli stretga collaboraziun cun RTR en connex cun ina purschida digitala, u integrar ina ediziun rumantscha en ina gasetta da lingua tudestga ed auter. La deputada, da chasa a Schnaus, ha fatg stim che l'impurtanza dal pled scrit rumantsch per la promozion linguistica na saja betg vegnida dubitada da la represchentanza rumantscha en il cussegl grond.